

# 1 Pedro

---

## **Pedro ishim Porrosht aabo òr saludo.**

**1** <sup>1</sup>Yok Pedro. Yok Jesucristo ir apóstol. Tichew ana hutita par olak israel oso uje olak Porrosht aabo uje olak dihipo kināho pork ebuhulo erze hnimo uje iiyo otsii Ponto, Galacia, Capadocia, Asia, hn Bitinia. Olak owich de poōrc per yesh olak de nāhu ĩrmo. <sup>2</sup>Porrosht uu eyok Deych chiihla olakkite pork chiraha wapni uje tyenij ye otiislo Jesus nehe, heke Porrosht ichibich churhū olak aho par uje ahakōrlo uje Jesucristo sahmūr. Uje Jesucristo tooho kruskite ir armista noshi hn ishi olak hnitewihi Porrosht ahir.

## **Pedro sehe duhu shish odiraha uje tyenij òr ikpo nehe.**

Sehe tuu Porrosht shish dosir olak hn shish duhu olak aho kiis. <sup>3</sup>Oyeeychāha Porrosht uu eyok Irhich Jesucristo ir Deych pork chuuna uje eyok losuhlaabo hn sosir eyok hn shuu eyok shurhāpo heke shuu yiraha uje tyenij eyok ikpo hn yitir eyok owich uje de Porrosht ahir nehe pork Jesucristo ikponi. <sup>4</sup>Kuche de wahacha poōrc uje Porrosht tibey par uje ishimihi olak nehe. Wir yelij nihna ire. Nihyok uje waresh, hn nihyok uje ir kolor noshi. <sup>5</sup>Uje ye otiislo Porroshtpe ich wichi tibey olak chira dakirbo nehech aachihilo ahir nehe. Olak owich dechi. Uje terihi ĩrmo uhurc nehe ich Porrosht shuu eychimlo olak owilo uje de ire ahir. <sup>6</sup>Uje ehn olak de nāhu ĩrmo ich shish olak aylpa pork olak owilo de wahacha poōrc, hn uje mihnūwo tir olak ich shi prowa olak ich kihniya uje kināho kināho, per shish tyenij olak aylpa. <sup>7</sup>Wir shuu imeheeych kimiji ũru uje ye otiislo Jesuspe o kimiji ye ũrpe shi itso uje ochibite ese oro jwekita eheth par uje oshuu imeheeych kimiji wichi oro pisht o kimiji ye wichpe. Ye otiislo Jesús ich ma bale je oro. Erze oro pwele sihna ire. Uje Jesucristo cheeshpo nehe ich tatim olak uje ich om uje ye otiislo irpe hn shuu olak aylpa hn shuu olak deyo. <sup>8</sup>Ye amlo Jesucristo petikni per shish ahmūrlo ire. Ele ahle ye amlo otik per ye otiislo irpe heke olak aylpa nehech ye erahalo uje athilo. <sup>9</sup>Shi pork ye otiislo Cristope heke olak owich de Porrosht ahir.

<sup>10</sup>Titim olak uje erze profeta poruwo wishi otatkite uje Porrosht takashim olak par uje shuu olak owich de dahir. Wir oshuu deyuwo tisirkite. Sehe odiraha ¿je shi Porrosht duhu inaapo par uje shuu òr owich de dahir? <sup>11</sup>Cristo Ichibich de erze profeta òr aho hn shuu otatim erze oso je deeych yet nehe hn oso oloter Cristo hn Cristo Ichibich shuu otatim òr erze kuche ihirtso uje tyenij tokole nehe. Erze profeta sehe odiraha yeèkpo ese Cristo hn latik nehe hn taãcha. <sup>12</sup>Porrosht shuu erze profeta ochiraha erze uje otatim oso wir ye par òr irpe. Erze ir ahwoso wir par olak. Porrosht shuu Dechibich ihmich, hn ele ahle Porrosht Ichibich shuu oso otatim olak uje Jesús ishi olak hnitewihi Porrosht ahirkite hn ye otiislo òr. Erze ahwoso uje otatim olak Porrosht ir anjele sehe odiraha toy.

### Porrosht sehe duhu ye oniyokòr uje mihnúwo.

<sup>13</sup>Titim olak. Shish uhu dish olak eyuwo par uje ahakòrlo uje Porrosht sahmür. Shi anemlo erze uje ich om uje Porrosht ishimihi olak uje Jesucristo cheeshpo nehe. <sup>14</sup>Shi itso uje pikihnint shiyokòr uje deych hn data otatim ire ich ahakòrlo uje Porrosht sahmür, hn ye eeshlopo ahakòrlo erze olak iluu mihnú uje antni ahakòrlo uje ehn yahpaa erahalo Porrosht petikni. <sup>15</sup>Ich nos wir erze uje ahakòrlo ich ye ahakòrlo uje mihnik pork ese uje chiihla olak par amsahalo par olak ir aabo yelij niyokòr uje mihnik. <sup>16</sup>Porrosht ir ahwoso tata im: —Ye ahakòrlo uje mihnik pork yok yelij tiyokòr uje mihnik.— <sup>17</sup>Olak uje ebiilo Porrosht on: —Dii Porrosht,— titim olak uje wichi jwe uje teychim oso kimiji oniyokòr uje mihnik o kimiji ye oniyokòrpe. Yelij duhu oso òr kināho hn duhu yewo òr kināho. Shish shuu nos òr itsye. Heke uje ehn yesh olak de nāhu írmo ich olak dihip kināho pork olak owich pisht de Porrosht ahir, heke shish ahakòrlo uje ich om hn atililo Porrosht. <sup>18</sup>Erahalo uje Porrosht shuu moymlo uje ahakòrlo erze olak iluu mihnú uje tāra uu olak poruwo wishi. Òr iluu ye jukur. Par chiyuhu olak shuu itsorz ich ishi olak hnitewihi dahirkite. Wichi bahat ye ilo erze olope hn plata. Wir shi taata shichish. <sup>19</sup>Shi uje Cristo tooho krus eeychkite hn ir armista noshi wichi uu bahat par ishi eyok hnitewihi Porrosht ahir. Nihyok yeèk pwele chibite ir armista bahat. Ire shi itso obejit uje ye wopikpe hn ye yarirsh uje oshuu par uje oteeychāha Porrosht. <sup>20</sup>Uje ehn yahpaa Porrosht niyokòr irmökite ichii chiihla Jesús par uje ishi oso òr hnitewihi dahir nehe. Ele ahle ich yej terihi írmo uhurc heke Porrosht shuu imeheeych uje Cristo ishi olak hnitew par uje sosir olak. <sup>21</sup>Shi uje ye otiislo Cristo heke ye otiislo Porroshtpe. Wichi shuu Cristo ikponi hn chibite ma dich. Heke ye otiislo Porrosht hn shi anemlo uje ishimihi olak owich uje de ire ahir.

<sup>22</sup>Porrosht ahwoso ich üru. Uje ahakòrlo uje tata ich erhülo olak aho par uje ahmürlo olak leshibo hn par uje ye uhulo olak aho yührsh. Tyenij

enahalo olak par uje ahmūrlo pishye <sup>23</sup>pork olak ich olak shurhāpo. Ye olak lata hn olak deychpe uje oshuu olak shurhāpo. Wir terihī ōr ishīryo ich otoy. Porrosht ahwoso shuu olak shurhāpo. Wir yelij nihna ire. Shish yakaha. <sup>24</sup>Ir ahwoso tata shuu itsorz:

—Nos wir oso shi ōr itso ihnemyo. Nos wir kuche uje oso otsahmūr wir shi itso ihnemyo uje pohna. Shi pohna hn kako hn kay, <sup>25</sup>per eyok Irhīch ir ahwoso shish yakaha. Yelij nihna ire.—

Erze Porrosht ahwoso wir uje otatim olakni shuu amsahalo par olak ir aabo.

**2** <sup>1</sup>Nos moymlō erze uje ich mihnūwo. Nos moymlō olak ukushiī, hn ye uhu olak aho yūhīrsh. Moymlō uje abitilo yewo ōr kuche, hn ye eyehnimlo yewo. <sup>2</sup>Uhulo olak ilo pīkihnt uje hni shūrha hn shish sehe duku lata ir isho. Ich uhulo Porrosht ahwoso ilpo par uje shish sehe erahalo ma hn ahakōrlo ma uje Porrosht sahmūr nehech uhurc ich olak iluu ompa <sup>3</sup>pork ich erahalonī uje eyok Irhīch ich ir iluu om.

#### **Cristo ich shi itso kojach per ika.**

<sup>4</sup>Ahakōrlo uje eyok Irhīch sahmūr shi itso uje ethīrlo olak ire. Wichī yelij duhu ire kinaha. Shi itso kojach per ire shish ika. Hnakirbo oshiyokōr pwertit ochīra kojano yewo per oym ese kojach uje Porrosht chiihla. Par Porrosht ich wichī ma bale je erze kojano yewo. <sup>5</sup>Olak itspo pork olak itso kojano per olak ika. Asimlo olak Porrosht par uje wichī shiyokōr lahuch chīra olak par uje olak saserdote par eeychāhalo ire, pork Jesucristo wichī uje ishi olak hnitew heke eeychāhalo Porrosht itso uje Porrosht sahmūr, <sup>6</sup>pork Porrosht ahwoso tata shuu itsorz: —Yok tibite kojach ese dit Siōn. Ese kojach uje tiihla ich debichpa. Wichī ma bale par pwertit. Erze uje yelij olotiis ire wichī yelij duhu opook.— Cristo wichī uu kojach. <sup>7</sup>Par olak ich bale pork ye otiislo irpe, per par erze uje otsotiis ire ich kinaha pork Porrosht ahwoso tata shuu itsorz: —Erze hnakirbo oshiyokōr pwertit ochīra erze kojano per otsitak ese kojach yetkite per ese kojach ich ma bale par ese pwertit je erze yewo. Wichī kojach itso Cristo.— <sup>8</sup>Hn tata toy im: —Ese kojach shi itso uje shuu ōr hnite hn shuu ōr kay.— Porrosht chibite uje nos wir erze uje ye oniyokōr uje ir ahwoso tata ich tyenij shi itso uje ōr kay. <sup>9</sup>Olak ye olak ilo ōrpe. Porrosht chiihla olak par ire. Wichī rey hn shuu amsahalo par saserdote par akashimlo oso uhulo oteeychāha Porrosht. Olak Porrosht aabopo. Olak Porrosht ir yilo hn wichī uu olak yīnsirc. Porrosht nos shiyokōr shuu itsorz par olak par uje atimlo oso erze uje shiyokōrni uje ich ihīrtso. Wichī chiyuhu olakihichis olak iluu shi itso uje olak de dihlelta par uje shuu olak iluu ich om shi itso uje erze luu uje ich ihīr chihit olak. <sup>10</sup>Tenitkite ye olak Porrosht aabope, per ele ahle ich olak Porrosht aabo. Tenit Porrosht ye nuunape uje olak losuhlaabo par uje sosir olak, per ele ahle ich chuuna uje olak losuhlaabo hn sosir olak pork ishi olak hnitewihī dahir.

**Wir tyenij oshiyokōr uje Porrosht sahmūr.**

<sup>11</sup>Pishibo watsaklo, ěrlo pahwoso uje titim olak. Olak owich de Porrosht ahir heke olak dihipo kināho uje yesh olak de nāhu ĩrmo. Heke moymlo erze ōr eyuwo mihnūwo uje sehe duhu ahakōrlo uje mihnūwo. Wir shi itso uje teye hōr wir erze eyuwo om uje Porrosht sehe duhu ahakōrlo. <sup>12</sup>Shish tyenij ahakōrlo uje ich om par uje wir oteychim olak erze uje ye odiraha Porroshtpe. Kimiji otata uje ahakōrlo uje ich mihnūwo, per omo uje ahakōrlo uje ich om ich shi otata lekushiĭ, heke deeych yet nehe uje Porrosht tirēt par sepyēr ōr ich ōr ire otata uje ahakōrlo uje ich om hn ōr ire oshuu Porrosht dich. <sup>13</sup>Titim olak. Porrosht wichi olak Irhĭch hn chĭbite uje tyenij ahakōrlo uje gobierno wimshiro otata. Uje ōr gobierno pisht tata kuchĕrk ich tyenij ahakōrlo. <sup>14</sup>Wir ōr itspo erze gobernadore tyenij ahakōrlo uje otatim olak pork gobierno chĭbite ōr par uje otsepyēr erze uje oshiyokōr mihnūwo hn otatim erze uje oshiyokōr uje ich om par uje ōr aho kiis. <sup>15</sup>Porrosht sehe duhu ahakōrlo uje ich om par uje erze uje ōr totihlo hn ye odiraha Porroshtpe ich ye ōr pwele otata uje ahakōrlo mĭhnik. <sup>16</sup>Ye olak chĭhi erze ley ir hmepe uje Moisés chichewkite, per ye ompe ahakōrlo uje ich mihnūwo. Shi ahakōrlo uje ich om pork olak Porrosht ir ĩbiyo. <sup>17</sup>Nos atililo oso uhulo itso uje wir ōr bahluwo. Ahmūrlo Porrosht aabo yewo. Tyenij atililo Porrosht hn tyenij atililo ese gobierno pisht.

**Porrosht aabo tyenij ōr ewenta erze mihnūwo uje tĭr ōr.**

<sup>18</sup>Titim olak uje olak Porrosht aabo per olak oso ōr yilo. Tyenij atililo olak yinsiro kimiji ōr ire ich om hn otakashim olak o kimiji ōr ire ich ōr iljaabo per shish tyenij atililo ōr. <sup>19</sup>Porrosht sahmūr uje yeĕk ewenta erze mihnūwo uje tĭr ire shi pork sahmūr Porrosht per ye niyokōrpe uje mĭhnik. <sup>20</sup>Kimiji olepyēr olak uje ahakōrlo uje ich mĭhnik ich olak ewenta per Porrosht ye tatim olak uje ahakōrlo uje ich om. Per kimiji ahakōrlo uje ich om hn shi otsepyēr olak ich olak ewenta heke Porrosht tatim olak uje ahakōrlo uje ich om. <sup>21</sup>Porrosht chiihla olak par uje amsahalo par ir aabo, heke shish tyenij olak ewenta erze kuche mihnūwo uje tĭr olak shi itso uje Cristo ewenta erze mihnūwo uje tĭr irni par uje ishi olak hnitewihĭ Porrosht ahir. <sup>22</sup>Cristo yelij niyokōr uje mĭhnik hn yelij tata dekushiĭ par sehnyēr oso. <sup>23</sup>Uje ochiyuhu lahwoso mĭhnuwōho irni par uje oshuu pook ich ye diyuhu lahwoso mĭhnuwōho ōrpe par uje shuu opook. Uje oshuu oshuu dospa ich ye tata latik par uje sepyēr ōr shuu dospa. Shi iim erze kuche mihnūwo uje oshiyokōrĭhi ire par uje Porrosht nishii. Wichi jwe uje shish shiyokōr uje ich om heke teychim kimiji oniyokōr uje mĭhnik o kimiji ye oniyokōrpe. <sup>24</sup>Nos yiyokōrlo kuche mihnūwo heke eyok hnitew de Porrosht ahir. Cristo ishi eyok hnitew uje

tooho krus eeych. Uje tooho krus eeych ich shuu itso uje yukwīya ire hn yiti par uje ye yiyokōrpe uje ich mihnūwo, hn shuu eyok ika par uje yiyokōr uje Porrosht sahmūr. Otsepyēr Cristo hn oshuu ir obilo kihniya. Wichu uu bahat par uje chiyuhu erze kuche mihnuwōho olak. <sup>25</sup>Antni shi olak itso obeji uje saham nanime. Ich ye erahalo uje etīrlo per ele ahle ich eeshlopo etīrlo ese olak Yinsirc uje tibey olak.

**Pedro sakit erze uje ochiileku.**

**3** <sup>1</sup>Titim olak uje olak Porrosht eebe. Tyenij ahakōrlo uje olak abich tatim olak par erze olak abiyo uje otsotiis Porrosht ahwoso ich ōr pwele ochiraha uje ich ūru shi pork ōr irēhte oshiyokōr uje ich om hn omasaha par Porrosht aabo. Heke ye nesita uje tatim ire <sup>2</sup>pork teychim nerāhta uje wate shiyokōr uje ich om hn uje tola Porrosht. <sup>3</sup>Olak timcher ye pwele uhulo olak iluu ihīrpe shi pork arshlo olak akīre hn aluwalo oro hn anāhalo olak ishuwo uje ich debichpa. <sup>4</sup>Shi uje olak iluu ich om hn shish olak aho kiis, heke Porrosht chībīte uje olak ma bale. <sup>5</sup>Antkite uu timcher poru yesh uje otsahmūr Porrosht shish oshiyokōr oshuu itsorz hn otola dabiyo <sup>6</sup>shi itso waa Sara uje shiyokōr uje Abraham tatim ire. Tibii dabich im pinsirc. Olak shi olak itso uje olak Sara eebe kimiji ahakōrlo uje ich om hn ich ye ompe uje atililo latik. <sup>7</sup>Titim olak toy uje olak irēhte ode. Tyenij akashimlo ōr hn abeylo ōr hn ahmūrlo ōr pork ye ōr ukurbo ilo olakpe. Porrosht sahmūr ōr itso olak. Wir ōr ikirīt de Porrosht ahir shi ōr itso olak. Kimiji ye ahakōrlo uhulo itsorz ich ye olak eyuwo ilype heke ye Porrosht nuntpe uje olak orar.

**Pedro sakit erze uje kuche mihnūwo tīr ōr.**

<sup>8</sup>Nos titim olak uje olak Porrosht aabo. Tyenij nos akishlo olak eyuwo hn eenilo uje mīhnik tīr olak yet, hn ahmūrloye hn akashimloye. Ye olak narim olak. <sup>9</sup>Ye eyuhulo olak bahat uje yeēk shiyokōr mīhnikīhi olak. Uje yeēk chiyuhu lahwoso mīhnuwōho olak ich ye eētlo ire eyuhulo olak ahwoso mīhnuwōho ire. Ma om tyenij eyuhulo olak ahwoso uje ich omoho ōr pork Porrosht chiihla eyok par uje yiyokōrlo itsorz. Uje yiyokōr itsorz hn ishīm eyok erze uje ich om <sup>10</sup>pork Porrosht ahwoso tata im:

—Uje yeēk sehe duhu dekirīt berzak hn shish ehēt kiis ich tyenij tibey lahwo par uje ye diyuhu lahwoso mīhnuwo hn tyenij tibey lahwo toy par uje ye tata lekushiī. <sup>11</sup>Tyenij iim uje shiyokōr uje mīhnuwo par uje shiyokōr uje ich om. Tyenij chukwi erze uje shuu ehēt kiis hn ye noym <sup>12</sup>pork eyok īrhīch tibey daabo uje oshiyokōr uje ich om hn chunt ōr uje ōr orar otsapur ire. Per eyok īrhīch teychim erze uje shish oshiyokōr uje mīhnuwo hn chiyuhu delorihī ōr.—

<sup>13</sup>¿Yeēkpo shiyokōr mīhnikīhi olak kimiji shish emitlo olak par uje ahakōrlo uje ich om? Nīhyok. <sup>14</sup>Per kimiji yeēk niyokōr mīhnikīhi olak

shi pork olak Porrosht aabo hn ahakõrlo uje ich om ich Porrosht tyenij takashim olak. Ye atililo õr, hn ye aslo olak ibe. <sup>15</sup>Shi tyenij uhulo yakaha uje Cristo wichi uu olak Irhîch. Shish tyenij emitlo olak par uje yeëk sehe diraha inaapo ye otiislo uje olak owich de Porrosht ahir ich erahalo uje tyenij atimlo õr. <sup>16</sup>Shi tyenij ye atsirâha olak ahwoso par õr hn tyenij atililo Porrosht. Shish ahakõrlo uje ich om par uje shish olak eyuwo tisir uje ich om. Heke erze uje ochish majamichîhi olak pork olak iluu ich om hn olak Porrosht aabo ich uhurc ich yeëk shuu opook uje shi otata oshuu itsorz. <sup>17</sup>Kimiji Porrosht duhu erze kuche mihñuwo tîr olak pork sehe prowa olak ich ma om uje erze kuche mihñuwo tîr olak pork ahakõrlo uje ich om per ye ompe uje ahakõrlo uje ich mihñuwo heke erze kuche mihñuwo tîr olak.

<sup>18</sup>Cristo toni par uje ishî olak hnitewîhi Porrosht ahir pork ahakõrlo uje ich mihñuwo. Wichî ich ye toy petik nehe par uje ishîpo. Ye niyokõrpe erze kuche mihñuwo per toni par sosir erze oso uje oshiyokõr uje mihñuwo. Heke Cristo shuu olak owich de Porrosht ahir. Oshuu Jesús oshuu toy per shî ir yûhurra toy mahn ir ichîbich shish de heke ir ikirît de. <sup>19</sup>Ir ichîbich hno tîr wahacha uje topo õr ichîbiyo de hn sakit õr. Wir shî õr itso uje Porrosht chîbite õr karsel eheth pork ye õr pwele otokolpe.

<sup>20</sup>Uje ehn Noé lishî shiyokõr asa pohorra hn Porrosht iyem oso par uje onishii deyuwo per ye oniyokõrpe uje îre sahmûr. Heke shî õr arhaabokite uje ye otooho ese kresyent bahlut eheth pork shî õr osho uje ode asa pohorra eheth. <sup>21</sup>Ese kresyentit shî itso uje otohîrm olakni pork ye otiislo Jesuspe par uje shuu olak owich de Porrosht ahir. Ese otohîrm oso ich ye îlo uje otisoho awîtpe par uje ochûrhu õr. Otohîrm erze oso par uje otsapur Porrosht par uje churhû õr eyuwo mihñuwo pork Jesucristo ikponi. <sup>22</sup>Cristo hno tîr poõrc hn sakaha Porrosht waächta pork wichi ich dich. Erze anjele ode Cristo ir hme, hn erze õr bahluwo hn erze uje õr ukurbosh ode ir hme toy.

#### Porrosht shuu õr dîtuwo par uje otakashimye.

**4** <sup>1</sup>Uje ehn Cristo de nâhu irmõni ich ewenta erze kuche uje tîr îre uje ich dospa. Tyenij uhu olak eyuwo îlo îre pork uje yeëk ewenta erze kuche mihñuwo uje tîr îre uje ich dospa ich ye niyokõr uje ich mihñuwo <sup>2</sup>par uje ehn yesh sakaha nâhu îrmo ich shî shiyokõr uje Porrosht sahmûr hn ye niyokõr uje erze oso yewo oshiyokõr. <sup>3</sup>Uje ehn yahpaa amsahaloni par olak Porrosht aabo ich shish ahakõrlo mihñuwo shî itso erze uje ye odîraha Porroshtpe. Erze uje ye odîraha Porroshtpe oshiyokõr nos wir kuche mihñuwo ich kihniya. Otsahmûr uje shî omuhuye ahir par uje oshiyokõr uje mîhnik, hn otsahmûr uje yîkîch sêhi õr. Otakisho lawich oshuu itso uje oshiyokõr õr ahamich par oteyâha timcher, hn shish oshiyokõr ahamich par uje oshuu yîkîch sêhi õr. Oteychâha kojano po.

Wir ich mihñūwo pisho. <sup>4</sup>Ele ahle ich ye meylo ōrpe par uje ahakōrlo erze mihñūwo uje shish oshiyokōr, heke ōr ire ochishlabe hn ochiyuhu lahwoso mihnuwōho olak. <sup>5</sup>Je deeych yet nehe hn oyehe Porrosht ile ikich par otatim ire erze mihñūwo uje oshiyokōrni. Wichī jwe uje shish chimit ire. Kimiji yesh ōr ika hn kimiji otoni ich itsye, tyenij sepyēr ōr nehe. <sup>6</sup>Heke ode uje otsanimirāha Porrosht ahwosni otatim ōr hn ode uje ye olotiispe. Wir otoy shi itso erze uje otsotiis per erze uje ye olotiispe ich ōr ichibiyo shish owich om. Shi ōr ichibiyo itso Porrosht ir ikirīt uje yelij nihna ire.

<sup>7</sup>Titim olak uje yej Porrosht sihna ĩrmo hn nos wir kuche, heke shish tyenij emitlo olak par uje olak orar. <sup>8</sup>Enahalo olak par uje ye moymlo uje ahmūrloye pork uje ahmūrloye ich shish olak perdonar erze uje oshiyokōr mihñikīhi olak. <sup>9</sup>Shish tyenij ahmūrlo uje Porrosht aabo yewo otekirihī olak hn ye uhulo olak aho diilehet uje ye ahmūrlo ōrpe. <sup>10</sup>Titim olak. Porrosht shuu olak nohmīr nohmīr dituwo par uje kal nohmīra pwele shiyokōr uje ire sahmūr, heke tyenij akashimloye uhulo itsorz par uje tokole uje olak Porrosht ĩbiyo uje ich om. <sup>11</sup>Uje sehe yeēk nanimīrāha Porrosht ahwoso ich tyenij shuu itso uje Porrosht tata. Kimiji Porrosht dosim olak ukurbo par uje ahakōrlo kuchit ich enahalo olak par uje ahakōrlo pork ye otiislo Jesucristope heke uhulo oso oteeychāha Porrosht. Sehe tuu nos onahmūr uje Porrosht wichī uu ōr bahlut pisht hn oteeychāha ire par uje wichī shish tibey ōr. Ich ĩhīrtpa kimiji oniyokōr oduhu ĩlorz.

### **Shish kuche mihñūwo tīr Porrosht aabo.**

<sup>12</sup>Pishibo watsaklo, ye as olak ĩbe uje erze kuche mihñūwo doso pisho tīr olak. Erze doso ich shi itso jwekita. Wir shi tīr olak par shuu ĩmeheeych uje ich ũru uje ye otiislo Jesucristope. Erze kuche mihñūwo ye kināhope uje tīr erze Porrosht aabo yewo. <sup>13</sup>Ich ma om uje olak aylpa uje erze kuche mihñūwo tīr olak shi pork ye otiislo Cristope. Heke uje ire cheeshpo nehe ich olak aylpa hn nos omo uje ire ich dichpa. <sup>14</sup>Kimiji odiyuhu lahwoso mihnuwōho olak shi pork ye otiislo Cristope ich om par olak pork Porrosht Ichībich ich dich hn shish de olak aho hn shuu olak aylpa. <sup>15</sup>Ye ompe uje olak yeēk shuu yet shuu toy heke kuchit mīhnt tīr ire, hn ich ye ompe uje olak yeēk tohīr heke kuchit mīhnt tīr ire, hn ich ye ompe uje olak yeēk shiyokōr uje ich mīhñik heke kuchit mīhnt tīr ire, hn ye ompe uje dale kuche ĩkiyo heke kuchit mīhnt tīr ire. <sup>16</sup>Per kimiji kuchit mīhñik tīr ire shi pork wichī Porrosht aap ich ye ompe uje pook. Shi tyenij teeychāha Porrosht par uje shuu ire dich pork wichī ye lotiis Cristope. <sup>17</sup>Ele ahle ich terihī ishīrīt uje Porrosht teychīm daabo kimiji oniyokōr uje om o kimiji ye oniyokōrpe. Kimiji Porrosht teychīm eyok wap uje yiyokōr om o ye niyokōrpe hn sepyēr eyok ĩich duhu ĩnaapo

par erze uje ye onahmürpe uje Jesús ishi òr hnitewihi Porrosht ahirkite? <sup>18</sup>Kimiji Porrosht aabo òr pwele par uje otaachìhi ir ahir per ich kwestpa pork shish mihñuwo tìr òr ¿Porrosht duhu inaapo erze uje oshiyokòr uje ich mihñuwo hn erze uje otsotiis ire? <sup>19</sup>Heke kimiji Porrosht duhu erze kuche uje mihñuwo tìr olak pork sehe niyokoràha olak kuche ich ma om uje ye moymlò uje ahakòrlo uje ich om hn asimlo olak Porrosht par uje wichì tibey olak, pork wichì uje shiyokòr eyok hn ir ahwoso shish yakaha.

### Pedro sakit Porrosht aabo òr bahluwo.

**5** <sup>1</sup>Titim olak uje olak iiyo otsii anciano pork abeylo Porrosht aabo. Yok anciano toy. Tokomni uje oshiyokòr mihnikìhi Cristo hn ochìbite krus eeych par uje tohochis. Uje Cristo cheeshpo nehe ich ire rey hn yok dechi ir ahir. <sup>2</sup>Abeylo Porrosht aabo shi uhulo itso uje oso otibey obeje. Porrosht ishim olak erze obiyo par uje ahakòrlo. Ahakòrlo shi pork ahmürlo hn ye etaklo uje ahakòrlo. Ye ahakòrlo shi pork ahmürlo hnote. Enahalo olak uje ahakòrlo. <sup>3</sup>Ye uhu olak ilo òr bahluwo uje shi ochìpa oso per akashimlo òr par uje wir oshiyokòr oshuu itso olak. <sup>4</sup>Olak shi olak itso erze uje otibey obeje hn Cristo wichì uu olak bahlut pisht. Uje cheeshpo nehe ich ishim olak ese uje ich ihìrtpa uje yelij nihna ire. <sup>5</sup>Shi itso uje erze anciano oshiyokòr uje Cristo tata ich olak uje olak hnakìrbite tyenij ahakòrlo uje erze ilaro otata. Nos wir olak tyenij akashimloye, hn ye olak narim olak. Porrosht ye nahmürpe erze uje onarim ire per takashim erze uje ye onarim irpe. <sup>6</sup>Olak ye olak narim olak. Porrosht wichì uje tibey olak. Uje terihi uhurc nehe ich Porrosht uje ukurbo deyo de tyenij shuu olak ma deyo. <sup>7</sup>Erze kuche uje uhu olak eyuwo tisirìhi moymihilo par uje shi Porrosht nishii pork wichì tibey olak. <sup>8</sup>Shish emitlo olak shi itso uje ye omope pork ese olak imehèt wichì dyablo. Shiyokòr shi itso ilpiyot uje dirkihi lekìtiyo hn yer teyàha labiso par uje tew. <sup>9</sup>Ye ahakòrlo uje dyablo sahmür. Ye otiislo Porrosht. Erahalo uje erze mihñuwo uje tìr olak wir shi itso uje tìr olak leshìbo uje ode ìrmo lekìtiyo. <sup>10</sup>Erze kuche mihñuwo uje tìr olak ich dospa per ye shish dakaha olak ahìrpe. Porrosht nos nishii nehe hn takashim olak hn ishim olak ukurbo. Porrosht wichì uje shish sahmür olak hn chiihla olakni par uje aachìhilo ir ahir nehe hn ebuhulo pork ye otiislo Jesucristope. <sup>11</sup>Sehe tuu nos onahmür uje Porrosht wichì uu òr bahlut pisht par uje wichì shish tibey òr. Ich ihìrtpa kimiji oniyokòr oduhu ilorz.

### Pedro ishim Porrosht aabo òr saludo.

<sup>12</sup>Tichew ana hutìta par uje Silvano hnoy ishim olak. Wichì ye lotiis Jesuspe. Asa hutìta uje tichew titim olak ye ahwoso kihniyape par uje takit olak par uje erahalo uje ich ùru hn ye moymlò erze uje Porrosht



shiyokōr par olak. <sup>13</sup>Porrosht aabo uje ode dit Babilonia oshim olak saludo. Wir uje Porrosht chiihla òr shi itso uje chiihla olakni. Pijit Marko ishim olak saludo toy. <sup>14</sup>Etiloye par uje nos ochiraha uje ahmūrloye. Olak uje ye otiislo Jesucristope sehe tuu Porrosht shish duhu olak aho kiis. Ich ihārtpa uje itsorz.